



UPA 2017/139
Nuuk, 20.04.2017
Kelly Berthelsen

Uunga siunnersuut: Nunaoil A/S pillugu Inatsisartut inatsisaata allanngortinneqarneranik Inatsisartut inatsisaat nr. xx, xx 2017-imeersoq (Ingerlatseqatigiiffiup siunertaata, siulersuisut katitigaanerisa il.il. allanngortinneqarnerat)

(Aningaasaqarnermut Akileraartarnermullu Naalakkersuisoq)

Nunatsinni inuussutissarsiornikkut nappatissatsit siunniussimasatta ilaat pingaaruteqarluinnartut tassaapput aatsitassarsiorneq uuliasiornerlu. Uuliasiornerlumi tassaavoq nunat ikinngitsut atugarissaarfiulernerannut aqqutaasimasooq. Nunattalu eqqaata uuliaqarsinnaanera ilimanniunneqarmat sooruna uaguttaa isumalluaqaagut tassami Nunaoil toqqaannartumik aningaasaliisuteqanngikkaluarluni uuliasiornerni inatsisit malillugit 6,25 aamma 12,5% akornanni piginneqataasinnaammat, taamalu uuliamik annertuumik nassaar-toqassagaluarpat nunarput assorsuaq pissarsiaqarsinnaammat.

Ukiunili kingullerni ujaqqat sioqqallu uuliaannik paaasinnaangorneq pissutigalugu uuliap akia assorujussuaq apparsimammat nunatta eqqaani uuliaqarneranik misissueqqissaarnerit maannamut univissimapput. Aningaasaliisartut peqarfinnut qularnanngitsunut aningaasartuuteqarfiuallaartanngitsunullu taamaallaat aningaasaleerusussuseqalersimapput.

Tamassa tassa nunarsuatsinni piviusut Nunaoil A/S-ip naleqqussarfigisari-aqagai. Tamannalu pillugu inatsisissatut siunnersuutikkut ingerlatseqatigiiffiup suliaanik siulersuisoqarneranillu naleqqussaaniarneq Inuit Ataqatigiinniit taper-sorsorparput.

Kisianni, nunarsuatsinni inuit nutaaliaasumik atugartuunngoriartortillugit amer-liartortillugillu nukik annertoorujussuaq suli pisariaqassaaq. Nukissiutillu min-gunnanginnerusut ineriartorfiugaluqisut uulia pisariaqartinneqarallassammat ilisimasanik katersisinnaasumik, uuliasortoqalissagaluarpallu nammineq aningaasaliisuteqaaqqaanngikkaluarluni piginneqataasinnaasumik ingerlatseqatigiiffeqartuarnissarput pisariaqassammat Nunaoil AS/-ip ingerlanerminik naleqqussaasimagaluarni ingerlaannarnissaa tassungalu periusissiornissaaq Naalakkersuisut Inuit Ataqatigiinniit kaammattuutigiumavarput.

Taama oqaaseqarluta inatsisissatut siunnersuutip pineqartup akuersissutigineqarnissaa Inuit Ataqatigiinniit inassutigissavarput.

Qujanaq